

## 2 Oritxi Mahãdu-ò 2 Oritxi Hãwã Dohodỹna Mahãdu-ò

<sup>1</sup> Jiarỹ, Paulo, Deuxu deòduõ watzireri Deuxu-deewireki. Tahe katyyriti rewahinyreny Oritxi hãwã dohodỹna mahãdu-ò. Iny seriòreny Tximòtxi wawana ihỹre. Tule rewahinyrenyre ibutu ityhydỹdu mahãdu roholakemy Akaia bedeki.

<sup>2</sup> Ruxetòena, ywina-wana adeereny kanakemy idi watzireri Deuxu inytybyreny-ribi Jesuisi Kristu Inynyrỹ-ribi.

<sup>3-4</sup> Deuxu heka Jesuisi Kristu tyby rare. Iny wiòhedỹdu ihỹre. Ruxetòena sòwemy inydeereny riwahinymyhỹre. Ibutumy aòmydỹna-di riwiòhenanymyhỹre. Tai tahe iny witzira rikiwiòhenanyrenykre Deuxu wiòhedỹna-di.

<sup>5</sup> Iwese Kristu aòhòkỹmy dỹnana kaiboho teerytenyte wese, Kristu wiòhedỹna bitamy bierybenyke.

<sup>6</sup> Jiarỹboho aòhòkỹmy arotỹnyrenykreu, awiòhenadỹrenykre tuukre. Tai tahe tarasana iribi bitake. Deuxu-ribi wiòhedỹna arimynykeki, kia biu-ò hena iribi bimynyke arawiòhenanyrenykre. Tai tahe kaiboho arururenydikre aòhòkỹmy botỹnybenykreu.

<sup>7</sup> Tahe wararòsòna sòwemy ihỹre akireny. Tiubo aòhòkỹmy dỹnanamy botỹnybenykreu tule wiòhedỹna bitabenyke iwese aritarenykre wese.

<sup>8</sup> Waityhydỹdu seriòre, Asia bedeki jiarỹboho sòwemy aòhòkỹmy ratỹnymy roiremahã. Wadeereny heka isiratyhyre ibede-ki. Tai

heka raberumy roiremahã arururenyke lau.  
<sup>9</sup> Rahõtinyrenyre tai wakananareny sana. Kiamy heka wadeereny ditÿnynyde bedeernamy: ixi-di inyõ nohõtĩomy, Deuxudihyyle wahe. Tii dori rubu-ribi ixixadu rare. <sup>10</sup> Inatyhymy tii riwatarenyre kia brebuna-ribi. Ibutu aõna aõna-ribi riwatarenykre ixityre. <sup>11</sup> Kaiboho dori wadeereny Deuxu-ò textitøenytenyteri. Tahe ibutumy ixitøena-ò Deuxu kodoholakre tai riwiøhenanykre. Tahe ibutumyiny Deuxu riteàlànanykre.

<sup>12</sup> Ibutumy jiarÿboho heka kia Deuxu-deewimy rewinymyhÿrenyre. Tai heka wadeysarenyre jiarÿboho. Awanareny heka tule rarybemahãrenyre: øbitinamy, Deuxu rurunamy. Iny raykywydyna-di aõkõ wahe, Deuxu raykywydyna-di. <sup>13-14</sup> Idi mariakele, biritinykele, bierykele, kia reritinyrenyre adeereny. Wiji urihimyøle teerymy toite. Jesuisi txu tahe ibutumy bierybenyke. Jiarÿboho areysarenykre bierybenykeki wahe. Tule kaiboho beysabenykre.

<sup>15-16</sup> Juhuu rahõtinyre kiawesemy: arakemy ixi-di rahõtinyre. Juhuu heka Macedonia hãwã bede-ò arakemy ixi-di rahõtinyre. Iule tahe aroramy arakemy heka ixi-di watxiwãhã. Øeseu tasÿ tule, aroramy adehemynykre. Tai wiøhena inatximy bitake. Jiarÿ ayrenymy areakreu, Judeia bede-ò arakemy kaiboho biwawiøhenanybenykemy. <sup>17-18</sup> Reòsamy watxirerimy aõbohe wadi tahõtinytenyteri? Ixiòrarukile aõbohe tuuremy adee araÿraxikre?

Tuu aõbo iximy rarybere kohe, myỹ, iule. Aõkõre, myy rarybere, iule wahe. Inatyhymy aõbohe rarybereri. Aõkõre rarybeõre. Jesuisi Kristu heka warybe rieryre. Kohe, myy, iule. <sup>19</sup> Tai heka raryberenyre: –Inatyhy rare. Myỹ wahe, Deuxudeewinamy. Sila Tximòtxi-wana kia Deuxu rybe-di adeereny ritỹnynyre, Jesuisi Kristu iriðremy, jiarỹ tule adeereny kia retỹnynyre. <sup>20</sup> Inyboho ratximyhỹre Jesuisi Kristu-ò. Kristu heka Deuxu widỹỹdu ratxireri. Inyummyreny ratximyhỹre. Deuxu heka tuu iny rierynanymyhỹrenyre, tii inatyhy. <sup>21-22</sup> Tii heka iny ritamyhỹrenyre; rihitximyhỹrenyre; tahõrõ mahådumy riwinyre. Inydeereny riwahinyre Deuxu Tyytybytyhy inyworeny-ò risỹnyre. Tai heka inyboho rõhõtynyrenyre inydeereny ibutumy riwahinykremy.

<sup>23</sup> Deuxu heka warayky rieryre. Tai heka rarybemahãre, inatyhy raõre Oritxi hãwã-ò. Tai heka adiride ixinamy. <sup>24</sup> Araryberenyðtyhy jiarỹboho aõbo bityhynybenykemy, mary-bebenykemy. Kaiboho dorihe inatyhyna tetyhynytenyte. Urile tahe arawiðhenanyrenykre deysana-di Deuxu Tyytybytyhy dee deysana-di.

## 2

<sup>1</sup> Tai wawo rerahõrera. Arakemy aõkõ abedeòtiidỹỹrenymy ixityre.

<sup>2</sup> Arabedeòtiidỹỹnyrenykeki tahe mobo riwateysanykre. Kaibohole toite. <sup>3</sup> Tai adeereny reritinyre. Anaðtyhy heka abedeòtiidỹỹrenymy. Kaiboho dori deysana-di biwasỹnybenyke. Iu wadeysamy watxireriu, kaiboho tule

beysabenykre. Kia heka reerywiwire jiarỹ.  
 4 Adeereny reritinyre bedewona-di ranywãhãu;  
 warube rytynmahã. Bedeòtiidỹna-di  
 arasỹnyrenykemy aõkõ kỹny. Tahe timybo  
 aluurenyremy kaiboho bierybenykemy adeereny  
 reritinyre.

5 Bedewonamy relyykeki, tiu inyõ wii  
 ribedewonyreu, riwabedewonyõtyhy. Aõtxi  
 arabedewonyreny. Waryberiti isirare  
 aõkõ ihỹre. 6 Aõhõkỹmy dỹnanamy yla aõkõ  
 rotỹnyre. Tai ixinamy rarekre wiji. 7 Wiji tahe  
 iwitzira aõmydỹnana biwinyke: biwiõhenanyke  
 iixãwididỹnadikemy. Tai tahe bedewona-di  
 sõwetyhymy riatyõtyhy bedewona-ribi wahe. 8 Tii  
 luunatyhy-di bierynanybenyke.

9 Tai heka adeereny õnosõna rewahinyre. Tai  
 juhoo waritidỹna adeereny rewahinyre. Jiarỹ  
 heka kaiboho rexiywinymy aõbo atxitenyteri  
 ityhydỹna-ò. Kiamy adireny watxireri.

10 Kai biixãwididỹnykeki heka, jiarỹ tule  
 ariixãwididỹnyke. Kia adeereny rikiwinyrenyke  
 Kristu òraru-ki. 11 Tahe Satanasi tiu iny  
 riatyrenyõtyhy. Inyboho rieryrenyre tii kia  
 riwinykemy riwisỹnymyhỹré.

12 Jiarỹ heka ròirenyre Troaji-ò Rybewihikỹ  
 tỹnydỹmy Kristuni-di. Tamy retehemynyreu,  
 isiraõlemy tai Rybewihikỹ dohodỹmy, Inynyryỹ  
 riwawiõhenanyre wahe. 13 Tahe wabedewomy  
 watxiwãhã inyseriõreny Txitu-ki rahaõrekí. Tai  
 tahe kia iny mahãdu reteòwarinyre arakremy  
 Macedonia hãwã-ò rare.

14 Tahe Deuxu deysana! Deuxu-wana  
 watxiwãhãrenyre. Tahe kia ijesu tai ritake.

Kristu heka ridykre ijesu tarasadu mahãdu. Rokoirenykre heka ihe-ki. <sup>15</sup> Iwese aderòna l̃nyrehek̃y ibutumy idi riàlànymyh̃re wese heka, kia wese inyboho roire. Ibutumy iny rierykemy heka ityhyd̃ỹdu mahãdu r̃yirerimy ih̃re. L̃nyrena wihik̃y Kristu ritoonyre wese Deuxu-ò inyboho roire. Iny l̃nyrena wese heka rare. Ityhyd̃ỹdu, ityhyd̃ỹdukòdu mahãdu-ò ramyh̃re. <sup>16</sup> Kia rityhynyõmyh̃re mahãdu tahe, t̃nyre rirubunyre. Rityhynymyh̃re mahãdu tahe t̃nyre iruweselemy rare. Kia aõmys̃d̃ỹna biwinybenyke. Isirare heka iaõmys̃d̃ỹ. <sup>17</sup> Inyboho heka sõwemy inywese aõkõ iny roire. Iwese iny riwymyh̃re aõwyrìore idi ijohomy, kia wese karybe rare. Kia Deuxu deòdu mahãdu heka iòwydimy aõkõ rybe riwymyh̃re. Tahe inyboho heka inatyhymy rarybemyh̃renyre. Deuxu dori inydeereny rarybere òbitinamy. Riwateònyrenyre òbitina-di araryberenykemy.

### 3

<sup>1</sup> Timyre heka tyyriti ritidid̃ỹnamy raruõhyamahãrenyre jiar̃yboho awirenyremy. Tahe waribireny tule aribireny kia Ritid̃ỹna arihureñyõt̃yhy. <sup>2</sup> Kaiboho heka Kristu tyyriti wese aõma toite. Riritinymy heka roimyh̃re inywo-ki, inyrayky-ki. Idi riramy kaiboho burubenykeki, aõbo kaiboho tewinymahãte heka tamy betehebenyke. Tai tahe rierymy idi rariake ixideele. Idi rariake hãre tahe idi rexibedeerynyke. <sup>3</sup> Kaiboho heka Kristu tyyriti wese heka toite. Inydeereny iwahid̃ỹmy heka tii rare. Kia tyyriti witxiramy rare. Aõ ritid̃ỹna

manamy aõkõ riwinyreri. Deuxu Tyytybytyhy-di tahe riwinyreri. Aõ manatyre-ki aõkõ ròritidỹỹreri inyraykyreny-ki, inyworeny-ki ròritidỹỹmyhỹre. <sup>4</sup> Deuxu heka retyhynymahãre, Kristu òraru-ki wahe. Tai tahe tuu raryberenymahãre kiawesemy. <sup>5</sup> Jiarỹboho heka warururenyõhyyre kaa aõmysỹdỹỹna widỹỹna-ò. Iny ruruna heka Deuxu-ribi sohojile nade. Tii iny wiõhedỹỹdu, aõ iny rikiwinymyhỹrenyke-ò wahe. <sup>6-8</sup> Irybe tỹmyra dohodỹỹdumy heka inyboho roire. Ihetxiu bede ywina wesemy aõko heka ròritidỹỹre Deuxu Tyytybytyhy ihỹre. Ihetxiu bede ywina heka rubu diwyde. Deuxu Tyytybytyhy iruna riwahinyre. Ihetxiu heka manatyre-ki ròritidỹỹre. Deuxu loosõna tule ròhõnyre, riwahinyreu wahe. Moisesi òsỹny-ribi sõwemy loosõna ròhõnyre. Idi tahe riixãwididỹỹnyre. Tahe judeu mahãdu reteheõhyymyhỹre iõsỹny-ò, iõsỹny loosõnadireki. Deuxu Tyytybytyhy heka iratyre awimy rare, iny-ò dori Deuxu irutyhy riwahinyre. Tahe bede ywina nade loosõna wiwihikỹ-di bede ywina tỹmyra tahe iratyre awi rare. <sup>9</sup> Tii heka iny-di ixãwikemy ratxireri. <sup>10</sup> Tahe iratyre rybe tỹmyra rare. Iny òraruna-di ixãwikemy ratxireri. <sup>11</sup> Kia urihimyò rỹire awi rare. Iratyre tahe umyuedeõna rare.

<sup>12</sup> Iny raròsõna sõwemy ratximyhỹrenyre. Tai tahe inyboho ruberuõhyymyhỹrenyre. <sup>13</sup> Moisesi wesemy aõkõ rakatximyhỹrenyke. Imahãdu raykytxymy dori rỹirenyre. <sup>14-15</sup> Imahãdutyxymy dori rỹirenyre. Moisesi bedeywina-di rariakeki, irayky ritòbònnyke. Kia rieryõrenyre iraykyreny

ratxynymyhÿrenyremy. <sup>16</sup> Kristu rityhynyre xiery, irayky raraymyhÿre. Iwese Moisesi òsÿnytòbòna òsÿny-ribi resere wese kia rare. <sup>17</sup> Kia Tyyriti-ki Inynyrÿreny heka Deuxu Tyytybytyhy rare. Tikibo Deuxu Tyytybytyhy rÿikeki kowa ibutumy iny ixinamy rÿike. <sup>18</sup> Tahe ibutumy inyboho heka Deuxu wowydyna iny òsÿnÿreny-ki ijòdire. Iwese iny òsÿnyreny itxena-ki iny retehemyhÿ wese, Deuxu wowydyna ibutumy robimyhÿke iny òsÿnyreny-ki. Inynyrÿ he Deuxu Tyytybytyhy rare. Iribi tahe wowydyna nade. Kia wese inyboho heka Inynyrÿ wesemy relemyhÿreny. Inihikÿmy delemyhÿdenyde. Tii dori iny worenny-ki raaòòtaòtamyhÿre.

## 4

<sup>1</sup> Deuxu taruxetòena-di heka kia aòmÿsÿdÿÿna inydeereny diwahinyde. Tai heka ikonanakòdumy idi rakatximyhÿrenyke. <sup>2-3</sup> Ibutumy heka rikiwinymyhÿrenyke aòbo òbiti rare. Aòbina binahakÿ widÿÿ-ò heka rekexiijerenyke aòbo òbitirele heka rikiwinyrenyke; riki-wiurònyrenyòtyhy heka Deuxu rarybereriki, tuu. Deuxuruòhyyle rikiwinyrenyke. Inatyhyna loosòna-ki heka rakatxirenyke. Ibutumy heka rikiwinyrenyke ibutu itxerena òbitimy wahe. Inyboho ritÿnynymyhÿre Rybe tymyra wihikÿ. Inyò-ribi riwòmy roimyhÿkeki tahe kia rityhynyòmyhÿrele tuu ritidimy roike. <sup>4</sup> Kiakeki tahe Satanasi iitxeredÿÿ-ò riijònyreri loosònamy robike lau. Deuxu binadÿÿna rare. Ibinadÿÿdu wesemy ratxireri. Kaa loosòna-ò iny riitxeredÿÿnyhyymyhÿre aòma

Rybewihikỹ tỹmyra-ò. Rarybemyhỹre dori Kristu heka Deuxu yrubule rare. <sup>5</sup> Iximy aõkõ rarybemahãrenyre. Inynyrỹ Jesuisi Kristulemy heka rarybemahãrenyre. Inyboho heka deòdumy inyboho ratximyhỹrenyre adeereny. Jesuisi òraru-ki kia rewinymahãrenyre. <sup>6</sup> Juhuu Deuxu rarybere: —Bedeluru-ribi heka loosòna doosòmehỹde. Tii heka loosòna-di inyraykyreny ritoosònanymyhỹre. Tai heka iny Deuxu erysydỹỹna inyboho rieryrenyre. Kristu òsỹny-ki sohojile tuu rokobirenyke.

<sup>7</sup> Kia heka aõna aõna wiwi inydeereny heka rare. Ihyna òwy riòre wesemy inyumyreny ratxireri, butxi weselemy wahe. Tai heka Deuxu sohojile irurudire, inyboho aõko irurudire. <sup>8</sup> Ihãrele heka aõbo iny riwinyke rieryõhyyhỹre timybo aõ iny riwinyke heka. <sup>9</sup> Aõhõkỹmy dỹỹnana heka inydeereny rehemyntymyhỹre tai inyboho ikyhynamy riemyhỹrenyre. Inyboho heka bedewodihyy ratximyhỹrenyre, tahe tiiemy iny raròsònarenydihyy inyboho ratximyhỹrenyre. <sup>10</sup> Inyboho heka itxi tõhõti reahyy inyboho ratximyhỹrenyre, Jesuisi rubuna-txi wahe. Kaki tahe iwese Jesuisi raremyhỹ wese heka rakatxirenyke. Tai iny witxira heka tuu robikre kiamy, Jesuisi rirudỹỹnanamy. <sup>11</sup> Jesuisi òraru-ki heka brebunahakỹ-ki inyboho roire. Kia wese-ki heka iny Jesuisi runamy robikre inykireny. <sup>12</sup> Kia-ki heka iny rubukonanareny inykireny rare. Tahe iruna akireny tule ratximyhỹre. <sup>13</sup> Kiamy heka Ritidỹỹna roire: —Jiarỹ retyhynyre. Taita rarybere: —Kia



weselemy roire. Retyhynyrenyneri tai heka jiarỹboho tule raryberenyneri. <sup>14</sup> Jesuisi ixixadyỹdu heka rare. Kaa tule inyboho tule riixixanyrenykre. Rikirònykre heka Deuxuko-txi. Kaiboho tule boibenyke wawanareny. <sup>15</sup> Jiarỹ wawanareny kia adeereny relere. Tamy Deuxu ruxetòena sòwetyhymy ramyhỹre-wana heka riwahinymyhỹre iratyre sòwetyhymy tamy deàlàna riwahinymyhỹre. Kia heka Deuxu wowydyna-ò tuu ratximyhỹre. Bedewoõmy.

<sup>16</sup> Iny bedewonaõhyre heka. Iny umyreny retybynyre. Txuõ txuõlemy heka ratỹmyranyke inywo-ki. Tiie heka aõbo rierynyre inatyhyy wahe. <sup>17</sup> Iny bededỹñanareny heka urihimyòle roimyhỹre. Iny wowydynarenyko-ki heka aõhòkỹmy dỹñana inyboho ritarenyke inydireny retehemyhỹre. Retyhenyrenyre wowydyna-ò awityhyremy inyboho idi retehemyhỹre iny idi retehòmyhỹredi. <sup>18</sup> Aõbo iny tuu robimyhỹre bede bedemy tuu iny robimyhỹre ibutumy idi reamy. Aõbo iny tuu robiõmyhỹre heka tiu itueõtyhy. Kia-di tahe inyboho ròhòtinymyhỹre.

## 5

<sup>1-2</sup> Inyummy tỹmyrahakỹ heka inydeereny kidiwahinykre Deuxu, iwitxira biu bede-ki wahe. Aõ hãbu wahisidỹña-ki aõkò Deuxu-di wahisidỹña-ki heka tuukre kia umy tỹmyra wahe. Tiu heka itueõtyhy. Rakabedeworenykre heka bede-ki iny telesòreny-ki rasỹnyreki inywo-ki wahe. <sup>3</sup> Inyboho heka biubede-ki inysỹreny inyummytỹmyra-ki ròkòhòtinymyhỹrenyke. Kaa iny umyreny wahe. Rabedewomyhỹreny.

Umy t̃myraõ heka rikitarenykemy inyboho ratximyh̃reny. <sup>4</sup> Aõherekibo inyboho wiji rabadeworenyre? Inyboho heka Deuxu bedewihik̃y-ò arõirenykekõ aõbo? Inyreny rikitarenykemy aõkõ wiji. Kaki aõhõk̃my d̃ỹnana riwawobeded̃ỹnyra. Kia aõbo umy t̃myra tyre tahe rikirutyrenyke ijõ wahe. Ijõ rikitarenykre umytuedeõnaõ. Tiu itueõtyhy. Kia riwinyre inydeereny kia wahe. <sup>5</sup> Deuxu dori tuu rarybereri inydee riwahinykremy. Tatytybytyhy dori diwahinyde diteòsinyde. <sup>6</sup> Kia iwese juhoo rarybere wese heka tuu rot̃ỹnykre. Tai heka inyboho teysamy ratximyh̃reny. Kabede-ki inyboho ratximyh̃re heka inyumyreny ratximyh̃re heka aõ Inynyr̃-wana aõkõ ratximyh̃re. <sup>7</sup> Tiu heka rokobirenyõtyhy rikityhynyrenykekile ka idi rakatxirenykre. Inyboho rieryreny timybo rarekre wahe. <sup>8</sup> Jiar̃y wadee awire kabede-ribi arexitake Deuxu-wana aras̃nyke wahe. <sup>9</sup> Aõma tamydeewimy heka tuu iny riwinyke wahe iny-wana ras̃nyke. Kaki iny ratximyh̃re tahe aõbo awire heka tamy awire. <sup>10</sup> Inydireny retehemyh̃re. Aõbo inyboho riwinymyh̃reny. Aõbina bina rikiwinyrenyke heka aõhõk̃my d̃ỹnana inydeereny riwahinykre. Aõwihik̃y riki rikiwinyrenykre wana tas̃y. Aõbo awityhy inydereny kidiwahinykre.

<sup>11</sup> Inynyr̃ heka inyboho rityhynymyh̃re. Tai inyboho iny witxira-ò tuu sõwemy relyymyh̃reny. Ibutumy heka Deuxu iny rierymyh̃reny. Kaiboho heka tule tiwaerymah̃atenyte. <sup>12</sup> Kia heka reraòmy watximyh̃reny biwaerybenyke. Ararybeõtyhy

heka adeereny jiarỹ awiremy. Tahe wadee ka awire kaiboho waluurenyke. Hãbu iumyle awimyy rỹirerimyy ihỹremyy idi rõhõtinyinmyhỹre. Tii heka òbiti aõkõ rare. Kia biwyònybenykemy adireny watzireri. <sup>13</sup> Juhuu iny rieryremyy itelesõ. Inymyrenyy rarybekeki itxỹtemyy inyboho roiremy. Rakaryberenyke heka aõbo inyboho dori Deuxu dee. Aõmysỹdỹrenymy hỹreki inydireny rõhõtinyinmyhỹre. Inymyrenyy rarybekeki inyboho awilerenyremyy. Iòrarureny-ki tuu rakatzirenyke. <sup>14</sup> Kristu luuna heka kiamyy iny riraykydỹnmy hỹre. Tii heka rurure iny ibutudee. Tii rurureu, ibutumyy inyderòwyrenymyy rurure. <sup>15</sup> Rurure heka aõma iny ixidee sohojile irumyy rareke lau. Kia tako-ò rakreu tamyy heka irumyy rakre. Tamyy dori rurure tai rexixare rubu-ribi. <sup>16</sup> Rakaraykynyrenyyke timybo hãbu awiré, ibinaré. Kaimyy heka rakaraykynyrenyyke. Aõ iwese iny witzira raraykynymy hỹre wese aõkõ raraykynyrenyyke. Aõma inyboho aõbo Jesuisi Kristu-di raraykynymy hỹre heka. Ixityre aõbo tuukre. <sup>17</sup> Tii heka umyy tỹmyra tuedeõna-di ratximy hỹre iwitzira ratximy hỹre. Juhu iaõmydỹnana iribi ixãwira. Tahe wiji raraykywydynanyre iwitziramy. Ibutumyy iaõna aõna ihetxiu heka rawitziranyre, awi-ò. <sup>18</sup> Deuxu heka ibutumyy kia riwinyre tamyy. Inyboho heka iòludu roire, juhuu wahe. Wiji tahe iliinamyy ijoi ratximy hỹre. Iny witzira heka iliinamyy rarekemy idi watziwãhãre. <sup>19</sup> Wiji tahe timybo Kristu rarybekremyy heka adeerenyy rarybereri. Aõma Deuxu kia liinamyy rarekemy wahe. Ixinamyy

Deuxu. Ka Deuxu aõ anaumywitziranydenyke. Kia Kristu òraru-ki tuu ratximyhÿre.

<sup>20</sup> Jiarÿboho Deuxu deòdu roire. Tai Kristu deròwomy adeereny rarybereri: Iluuna ixidee ixyby bimybennyke. Wii biwowixinybenyke.

<sup>21</sup> Deuxu heka iny òraruna ritidire Kristu tyre-ò. Kristu inyòrarunareny riwyre. Wiji tahe Deuxu òbitina inydeereny riwahinymyhÿre.

## 6

<sup>1</sup> Jiarÿboho tahe raaõmysÿdÿÿnyrenyke Deuxu dee. Deuxu ruxetòena dori tetatenyete, tai idi mohòtinybenyke, òhòtirenny-ribi losaõmykemy.

<sup>2</sup> Boholabenyke aõmybo Deuxu rarybereriò. Jiarÿ heka aluurenyre iurenana tahe ka arybe-ò raholareri. Arawiòhenarenyre iu wadee textitòenyteu, wadee taryteu. Boholake wiji heka bitabenyke Deuxu ruxetòena. Wiji heka biu-ò hena txumy bede rÿire.

<sup>3</sup> Inyõ iny aõmysÿdÿÿnarenymy ibinamy rarybekeki, uritere ijõ iny bedeworenyõmy, jiarÿboho òraru-ki.

<sup>4-5</sup> Jiarÿboho dori Deuxu deòdutyhy roire. Tai rikiteòsinyrenyke ibutumy aõbo inyboho dori Deuxu deòdu roire. Tai riteòsinyke ibutumy aõbo iny riwinymyhÿke. Aõna aõna rikiteòsinyrenyke. Òhòte wakireny rÿimyhÿre. Ròtenawo-ò ralòmyhÿrenyke.

Bedeweweky-ki aõhòkÿmy ratÿÿnymyhÿre. Sõwemy heka reòludunyre aõnana bina binahakÿ reòludunyre. Aõ òta òta reòludunyre. Sõwemy heka raaõmysÿdÿÿnynihikÿrenyke. Sõwemy heka aõmysÿdÿÿnadikre; tÿikõ bede reijereny; byreõmy bede reijereny;

<sup>6</sup> òbitimy heka rewinyrenyre. Aõma, ywiny-di ròwidỹrenyre bedeeryna-di. Ka roirewãhã iny iwitxira rewiòhenanyre. Ibutumy kia rewiòhenanymy roirewãhã. Deuxu Tyytybytyhy heka wawanahy roiremyhỹ. Luuna heka inydee reteòsinyrenyre Inatyhyna rybe heka retỹnynymahãrenyre. Sõwe heka ritỹnynymy, jiarỹboho Deuxu deòdu roire wahe. <sup>7</sup> Òbitina dori wadebònareny wese rare Satanasi itxemy. Jiarỹboho heka remymahãrenyre aritarenkemy. Tule iny rexiijemyhỹre òbitina-di. <sup>8</sup> Ijõ heka waluurenyre inyõ tasỹ aõbina binahakỹle wadee riwinymyhỹre. Ijõ heka Rybewihikỹmy wadee raryberemyhỹre. Ijõ tasỹ rybe binamy wamyre, raujõmo. Inatyhyna rarybemyhỹre. Tai wamy ruidu riwaninimyhỹrenyre. <sup>9</sup> Ibutumy heka iny riwayreny. Tahe rieryõhyymy heka inatyhy rare. Watxiwãhãrenyre rubu wese ihãre tahe warumy watxiwãhãrenyre. Tiiboho heka rubu wesemy inydireny ratximyhỹrenyre. Aõhõkỹmy ratỹnyrenyre hãre raruõhyylemy watximyhỹrenyre. <sup>10</sup> Aõna aõna heka bedewonihikỹmy ròhõnyre. Tiiemy wadeysahy watxiwãhãrenyre. Jiarỹboho heka urimynodule watxiwãhãrenyre. Ibutumy inyboho rityhydỹnyrenyre. Aõhomy aõkõ inyboho ratximyhyreny tahe ibutumy inydire roimyhỹrenyre.

<sup>11-12</sup> Tahe kaiboho ityhydỹydu seriòre mahãdu Oritxi hãwã-ki. Jiarỹboho heka kaa òbiti-my aõna aõnamy rarybemyhỹre. Kaiboho heka ijohona de-rarenyre aõmybo rarybemyhỹrenyreò. Jiarỹboho

heka aluurenyre. <sup>13</sup> Kai wariòre wesemy adee rarybereri. Umy iwese jiarỹ aluure wese, kai waluurenyre.

<sup>14</sup> Boholabenyke warybereny-ò ityhydỹdỹdukõdu mahãdu-wana aõmysỹdỹỹrenyõke. Timybo òbitinaõ heka aõbinaõ-wana raaõmysỹdỹỹke. Timybo heka loosõna bedeluru-wana ratxike? Aõkõre! Tiu wiwana rauriõtyhy. <sup>15</sup> Satanasi heka Kristu-wana raaõmysỹdỹỹnanyõtyhy. Itydyỹdu mahãdu wiwesehyyle raraykynykemy rỹira. Ityhydỹdỹdukõdu mahãdu-wana tahe wiraykyweseke aõkõre. <sup>16</sup> Deuxu aõmysỹdỹỹna heka iwitxi rare, suritxoo aõmydỹỹnana-ribi, wahe. Kaiboho heka Deuxu dohodỹỹna ijoimy toite Deuxu oworeny-ki ratximyhỹre. Deuxule heka kawesemy rarybere: –Jiarỹ heka wasỹ ariwinykre ayreny-ki. Jiarỹ iDeuxumy aronykre tiiboho waijoimy. Rorokurenykre. Tai tahe Inynyrỹ rarybere wiribi bihitxinyke. Inybina-ribi bexihitxinybenyke.

<sup>17</sup> Bexiebenyke òbitikõre-ribi wahe. Uritere tamy adi rexihumy, ixieryta aramyrenykre ix-idee wariòre wese.

<sup>18</sup> Warurutyhymy adee rarybere. Boomy heka adireny ararekre, jiarỹle wahe. Deuxu rutere rare jiarỹ.

## 7

<sup>1-2</sup> Deuxu ibutumy tuu rarybere: –Kai ityhydỹdỹdu waseriòre mahãdu. Tai tahe rikexiòbitinyke ibutu aõmydỹỹnana-ribi. Iny umyreny-ki rokobirenyke inyumyrenyy-ki. Òbitimy heka rakatxirenyke iko-ò, Deuxuko-ò.

Aõma waluummy heka atximahãbenykemy rahõtinywãhãrenyre. Iny-ò aõ bina bina rewinyõhyywãhãrenyre. <sup>3</sup> Tuhe kaa rarybere tahe ixityre anarybekre. Aluurenyre jiarỹboho ibutuhyye ratximyhỹre iny rummy ratximyhỹre hãre tasỹ rukururenkre tulekre. <sup>4</sup> Wadee heka awire ibutummy kaiboho ratximyhỹrenyre. Kai aõwixira wixira wadeereny rỹira umy retyhynyreki. Isirare heka wadee kia ratximyhỹhãrele Wadeysatyhummy heka watziwãhãre, wiõhedỹỹtyhy òraru-ki, ijyy òraru-ki.

<sup>5</sup> Jiarỹboho rethemynyre Macedonia bede. Taita tule elehynaõhyyre wadereny. Ibutummy heka aõna aõna, òta òta wixira wixira; bede bede ihyyummy aõkõre rỹire tai. Aõma bedewonihikỹ heka watelesõreny-ò ralore. <sup>6-7</sup> Deuxu riwawiõhenanyrenyre; Txitu diteònyde wadeereny. Tii rybereny heka awiremy kaiboho. Tai tahe reysarenyre jiarỹboho. Kaiboho tabedewomy atxitenyteri waòraru-ki. Katahe wadeysa nihikỹmy watzireri. <sup>8</sup> Adeereny warybetyyriti rewahinyreki tabedewomy atxitenyte. Tai tahe reysamy watzireri. Ihãrele heka tyyriti adeereny arawahinykre. Kaiboho heka tabedewotenyte iribi tahe aõmydỹỹna kaiboho tewixiranytenyte teòbitinytenyte ibutummy. <sup>9</sup> Tai tahe jiarỹ reysamy watzireri. Aõbinare dori rewinykõre arawiõhenyrenyre heka. <sup>10-11</sup> Deuxu heka iny ribedeòtiidỹỹnymyhỹre iny ywimy riraykydỹỹnykemy. Kia kidiwymyhỹke inydee tarasana wahe. Tii heka awire. Ijõ bededeòtiidỹỹ tahe bede ludu bede òtiidỹỹ. Kia tahe rubu diwymyhỹde. Kaiboho heka

tabedeòtiidỹỹnmyhỹtenyte. Deuxu heka kia riwinyre awiòhedỹỹnamy aõma kaiboho awirenyre. Aõ wixira wixira sõwemy akireny rỹireri, aõ òta òtareny. Kiadile tahe aõma òbitihyymy òhò ayreny-ribi kaiboho heka taykarananytenyte. Kaiboho heka waluudumy teletenyte. Kaiboho biwinybenykemy aõbo òbitimy ratximyhỹre iwidỹỹmy tarotenyte. Ibutumy heka òbitihyymy rarekemy idi tetehtenyte. <sup>12</sup> Tai kia tyyriti adeereny rewahinyre. Aõ kia rewinyre heka aõ iny iòrarudikekile aõkõre rewinyre. Idi aretehekemy heka. Kaiboho waluurenytyhyre aõbo òraru-ki wahe. <sup>13</sup> Tai heka wadeysamy watxiwãhãre. Aõ inyboho sohojile aõkõre teysa ratximyhỹreny. Txitu tule teysamy ihỹmyhỹre, kaiboho tawiòhenanyteki <sup>14</sup> Tu heka rarybere adeereny kaiboho òdori awimy tai tahatenyta awityhy. Adeereny heka inatyhyhy rarybemahãreny, inatyhynamy. Tule mobo rarybere Txitxu-ò. Ka tahe inatyhy rarybemy ratximyhỹre. <sup>15</sup> Tai heka Txitu kia luuna heka aõnityhymy akireny rare. Itxi heka tõhõti akireny aõma Deuxu tetyhynmahãte-txi. Kaiboho tedytenyteki. Ihãrele urihimyò ruberumy ratximyhỹ. <sup>16</sup> Reerymahãre jiarỹ kaiboho òbitimy boibekre. Tai wadeysamy watxireri.

## 8

<sup>1</sup> Deuxu ruxetòena-ki heka sõwemy riwinyre Macedonia dohodỹỹna mahãduy-ki wahe. Jiarỹ tuu arelyykemy idi watxireri waseriòreboho. <sup>2</sup> Sõwemy heka iaõna aõnareny iaõòtaòtarenyre tiiboho. Aõhõkỹmy rotỹỹnyreri tiiboho. Ihãrele



ka deysamy heka relerenyre. Reysareny heka. Tiiboho heka iaõkõrenyre. Aõhohomy aõkõ heka roiremyhỹ. Kiahãrele heka sõwemy riwahinyre tamahãdu wiõhedỹỹmy. <sup>3-5</sup> Riwahinyre heka sõwemy ixideewimy. Sõwemy riwahinykelemy wadee rarybere. Tiiboho heka sõwemy wiõhedỹỹmy rurumy roiremyhỹ. Tai inyboho ribedeõtĩnyre sõwerekĩ. Kia judea bedẽ, dohodỹỹna mahãdu, kia wiõhedỹỹmy. Juhu heka tiiboho rexiwahinyrenyre Inynyrỹreny-ò. Tule Deuxu deewina inydee riwahinyre. Iny wiõhedỹỹnarenymy rexiwahinyre. <sup>6</sup> Tai tahe jiarỹ rarybereri Txitu-ò: –Kai biwiõhenanykemy iaõmydỹỹnareny-ò. <sup>7</sup> Kaiboho heka sõwemy tetyhynyteri. Kaiboho heka Deuxumy awimy tarybemyhỹtenyete. Kaiboho heka teerytenyete Deuxu aõmydỹỹnana. Kiaboho heka waluureny waluuurenymy boibeke wawiõhedỹỹdureny. Biwawiõhenanybenyke. Tai heka sõwemy bexiòlòdỹỹnybenyke adireny watzireri. <sup>8</sup> Aõ bedẽ ywinaõ heka adeereny rewahinyõhyreri. Arierykemy heka idi watzireri timybo aluuna ratximyhỹremy. Tii riteòsiny heka timybo ijõ dowiõhedỹỹmyhỹdemy. Tai tahe iwese tii rotỹỹnyre wese kaiboho tule botỹỹnykre. <sup>9</sup> Deuxu ruxetòena teerytenyete, Jesuisi Kristu ruxetòena wahe. Tii heka ityhy rare. Tii rikõdỹỹnyre heka aõraruren-yki. <sup>10</sup> Taihyky tetyhynytenyete Deuxu aõmydỹỹnana-di. Kiamy heka raraykynyreri. Arawiõhenanykemy heka adireny rahõtĩnyre kanau bedeu. Tewiõhenanytenyete inatyhymy. Tai tahe biconananybenyke kia kanau bedeu

tewinytenyte heka biconananybenyke. <sup>11</sup> Aõma ireiõno, uriõno biwahinybenykeki, Deuxu heka rimyke. Kia-di rõhõtinyke. <sup>12</sup> Kia uriõnomy idi teywinymy atxiteri-di rõhõtinyke. Tamy wahidỹỹmy aõkõhyykeki tahe Deuxu aõma raraykynyõtyhy. <sup>13-14</sup> Jiarỹ heka isiramy adee ariwinyõtyhy aõ. Kaiboho heka sõwemy kaa wiji toite, Tai tawowi-di inyõ ròõkeki, taaõnasõwe myna Deuxu-ò riwahinykre. Iaõkõkeki tai ibinamy Deuxu rahaõtyhy. Tai biwiõhenanybenyke heka ihoõmy rỹira mahãdu. Jiarỹ heka aõ retõenyneri aõkõ rare, biwahinybenykemy. Kai ihoõmy atxikeki tahe, tule inywitxira anawiõhenanykre. Taita wiwanale wiwesehyyle rõhõnykre. <sup>15</sup> Kiamy heka Tyyriti-ki Ritidỹỹna roire: –Hãbuõ heka sõwemy ributunyre. Tahe aõhe rauhennyõhyyre tamy kia ibutuna-ribi wahe. Ijõ tahe ibutelemy ributunyre hãbuõ wahe. Tiile heka aõ tamy rasiranyõhyyre.

<sup>16</sup> Txitu awiõhedỹỹrenymy rurumyhỹre iwese awiõhedỹỹrenymy rurumyhãre wesele wahe. Deuxumy reàlãre tai, Deuxu dori tuu rotỹỹnyre. <sup>17</sup> Taita ixinamy arorarenymy rehemynykremy. <sup>18</sup> Riwiõhenanyrenyreri iwitxira seriõreõ. Ibutumy dohodỹỹna mahãdu-ribi tii rityhynymyhỹre aõma Rybewihikỹ-di ritỹnynymyhỹre awimy. <sup>19</sup> Dohodỹỹna mahãdu rihitxinyre wawana kanakemy. Ibutumy Inynyrỹ loosõna heka tuu ratximyhỹre. Tule riteõsinymyhỹre ibutumy iny rikiwiõhenanymyhỹrenykemy. Tai heka inyseriõreney reteõnyrenyreri ityhydỹỹdu mahãdu. <sup>20</sup> Tai inyõ kia nierumy inyõ rarybeõtyhy.

21 Òbityhylemy rikiwinyrenyke ibuturu-ò.  
 22 Ijõ tii-wana rake. Reurihirenyre heka tii wiòhedỹỹmy rakeò, tai heka tii wiòhedỹỹmy ratxireri. 23 Txitu heka waliina rare; wawana raaõmysỹdỹỹnymyhỹre heka rare. Jiarỹboho heka awiòhedỹỹrenymy rarumahãrenyre. Ijõ seriòerenyõ nade dohodỹỹna-ò wiòhedỹỹmy. Tai kaiboho wowydyna tamy biwahinybenyke. 24 Tai tahe dohodỹỹna mahãdu kaki rierykre. Tai rityhynyrenykre aõmybo umyreny rarybere. Tule wiluumy atxiteri.

## 9

1 Reerywãhãre jiarỹ wiòhedỹỹmy tarumahãtenyte Judeia bedeki. Tahe kiamy aõ aõkõ ariritinykre. 2 Reerywãhãre timybo akireny rare. Jiarỹboho heka awimy raryberenyre umyreny Macedonia hãwã mahãdu-ò. Myheka rarybere: –Akaia bede seriòre mahãdu wiòhedỹỹmy rexiwinymy ratximahãrenyre kau beòrau. Tai tiiboho rexideysananyrenyre. 3 Tai heka kaa seriòre mahãdu reteònyreri. Tai heka awikre biwiòhenanybenykre dori. Kiamy iwese rarybereri heka inatyhy rare. 4 Araixỹrukre heka jiarỹ aõma bexiwinybenyõlemy wiòhedỹỹna-ò atxibenykre-wana. Tule kaiboho maixỹrubenyke. 5 Tai heka inyseriòereny reteònyre akorenymy. Tahe iu arehemynykreu, bexiwinybenyke. Biwahinybenyke wiòhedỹỹmy atxitenyteri ixideewimy. Aõ jiarỹ adeereny rexitòenyneri aõkõ wiòhedỹỹmy.

6 Kia hãbu ibutemy ròbòròmehỹre heka ibutelemy tamy aõna aõna ruhunykre. Kia hãbu

sõwemy ribrònymyhÿre tahe tamy sÿ sõwemy aõna aõna ruhunymyhÿre tamy riwahinykre bederaty aõmydÿÿnana. <sup>7</sup> Tai heka iny sohoji sohoji ixideewimy tiwesebo riwahinymyhÿke. Riwahinyõke tahe aõ tuu rurukõreri urenana tuu ratxike. Deuxu dee riwahinymyhÿke mahãdu deysana-di riwahinymyhÿre kia iny mahãdu Deuxu tuure. <sup>8</sup> Deuxu heka riwahinymyhÿre sõwemy aõmybo tarumahãte kia inydeereny iratyre. Ibutumy aõmybo tarumahãte heka tule iny witxira biwiòhenanybenyke. <sup>9</sup> Kiamy Ritidÿÿna-ki roire: –Tii tawowi-di iaõkõ mahãdu-ò. Ròwahimyhÿre. Kia tahe iinydee wobrona tiemy rosaõmy rarekre. Deuxu heka riwahinymyhÿre tibo alòbòròdu-ò. <sup>10</sup> Inydee riwahinymyhÿre paõ iny rirÿsÿke. Tahe tule sohoji sohoji òwòrutumy rurumyhÿre heka tamy riwahinymyhÿre. Kia ribòrònymyhÿre tahe Deuxule ritxuhudÿÿmyhÿre. Tahe sõwemy bitakre Deuxu-ribi. <sup>11</sup> Kia rimymyhÿre mahãdu tahe Deuxumy reàlàmyhÿre. Kia tewinymahãte heka Deuxudeewimy tewiòhenanymahãte. Deuxu heka sõwemy rimymyhÿre eàlànareny iòraru-ki. <sup>12</sup> Kaiboho heka Deuxu mahãdu teriwiòhenanytenyete. Kia sohojile aõkõ. Tule aòraru-ki tiiboho Deuxu-ò wowydyna sõwemy riwahinyrenyke. <sup>13</sup> Kaiboho Rybewihikÿ tÿmyra tetyhynytenyteri, Kia ibutumy rierymyhÿre kaiboho dori uriõno tewiòhenanytenyete, tai iny wowydyna Deuxu-ò riwahinykre. <sup>14</sup> Adee rexitòenykre aluumy heka relekre Deuxu adee ruxetòena riwahinyreki. <sup>15</sup> Deuxu-ò wowydyna iny-ribi kanakemy heka idi watxireri. Wahidÿÿna

wihikỹ dori Deuxu inydeereny riwawahinyre.

## 10

<sup>1</sup> Jiarỹ Paulo heka aõmybo adeereny arexitõenykre. Aõherekibo tamy tarabemahãteny te awanareny watxiwãhãu urihimyòle watyhyna watxirerimy wamy tarybemahãteny te. Jiarỹ heka awana rybetere-di rarybeõmahãre awanareny watxireri wana. Tiu rareu, taheka ròritidỹỹre rybetere-di wahe. <sup>2</sup> Rõhõtinywãhãre. Rexitõenyre. Awi heka rare. Ywina-di iny risỹnymyhỹre. Inyõ wamyreny ibinamy rarybekeki tahe tule ararybeke heka. <sup>3</sup> Inatyhymy kabede-ki inyboho rasỹnymyhỹreny re. Rakaaõbinanykeki, inyumyreny aõbinana wesemy rare. Tebõnadirenyre. <sup>4</sup> Tebõnadirenyre. Aõ kabedemy iny rỹira kia debõna wese aõkõ kỹny. Deuxu debõna heka rỹira irurule heka rare. <sup>5</sup> Inyõ aõbinamy Deuxumy rarybemyhỹkeki, tai tahe kia wadebõnareny remy my resewãhãreny re kia ixãwididỹỹnamy wahe. Ibutumy Deuxu òludumy ratximyhỹre heka remywãhãreny re Deuxu rierykemy Kristu rityhynykemy wahe. Kaiboho heka ibutumy tetyhynmahãteny te. <sup>6</sup> Kaiboho biatybenykeki, tahe, rexihuhyomy rỹimyhỹre aõhõkỹmy dỹỹnana-ò. <sup>7</sup> Kaiboho heka tetehemahãteny te aõna aõna-ò ahana-ribi wesele wahe. Inyõrarakynykeki ratximyhỹreny ixinamy tuu raraykynyke. Jiarỹboho heka tule Kristu mahãdu hõrõ iny ratxirenyre. <sup>8-9</sup> Deuxu heka ruruõ wadee diwahinyde arawiõhenanykemy tai raixruõmyhỹre. Tai heka abrebudỹỹreny my aõbo kariti rewinyre. Urile tahe aumydỹỹreny adireny rewisỹnywãhãre

aõ bede arãatyremy aõkõ. <sup>10-11</sup> Ityyriti rybetere heka ribrebudỹỹ tahe rehemynyreu heka tii aõkõ rybetere-di rarybemyhỹre. Awityhymy aõkõ rarybemyhỹre riritinyreu. Iwese ròritidỹỹre wesemy aõkõ rarybere. Iu adehemynykreu tahe, iwese ròritidỹỹre wesele heka anarybekre. <sup>12</sup> Iny tai ratximyhỹre heka sõwemy ixidi rõhõtinyinmyhỹre tii awiremy. Kia tahe watximyhỹreny kia raryberenyõtyhy. Tii dori raitxỹtemy ratximyhỹ. <sup>13</sup> Aõmy iximy rarybemyhỹre dori tii awimy iximy rarybemyhỹre heka urile tuu raraykynymyhỹ. Timybo Deuxu inydee raryberele rikiraõmyhỹke. Kiawesele inydeereny awire. <sup>14</sup> Iaõmysỹdỹỹna heka timybo rikiwinyrenykele iny riijemyhỹreny. Juhu heka Rybe tỹmyra wihikỹ heka adeereny adiwykemy idi watxiwãhãre. Rewyreny heka juhoo Rybe tỹmyra wihikỹ adeereny rewyre. Tai heka tuu raryberenyõhyymahãreny timybo iny witxira aõmysỹdỹỹna riwinymyhỹreny. <sup>15</sup> Kaiboho heka aityhydỹỹnareny raumynykre. Tii heka wadeereny awire. Jiarỹboho heka aõmysỹdỹỹna wihikỹ sõwemy ariwinyreny kemy watxirenryeri ayreny-ki, Deuxudeewireki. <sup>16</sup> Idi tahe aròirenykre rybe-di aritỹnynyreny kemy ijõbede-ò, Rybe tỹmyra wihikỹ-di wahe. Aõmy ararybeõtyhy aaõmysỹdỹỹnareny iwitxira rewinyremy. Kiamy heka Ritidỹỹna-ki roire: <sup>17</sup> —Urile tuu rybe rỹike Inynyrỹ timybo riwinyrelemy. <sup>18</sup> Iny ixidi rõhõtinyinmyhỹre tii awireny. Tahe awi aõkõ rare Deuxu-ò. Deuxu tahe awimy tai rahamyhỹre tii idile rõhõtinyinmyhỹreki.

# 11

<sup>1</sup> Jiarỹ òsana urihimyò raitxỹtemahãremy kaiboho wawana tòiterimy ixi-di atxitenyteri. Ihãrele taheka urihimyò reòludunymahãre. Jiarỹ heka okorenyre iwese Deuxu ratximyhỹre wesele. <sup>2</sup> Ywimy atximahãbeny adireny watxireri. Kaiboho iwese ijadòma hãbumy roikre wese toite. Hãbu heka Kristu rare. <sup>3</sup> Jiarỹboho raberuwãhãrenyre kaiboho Kristu-wana atximahãbenyke lau wahe. Iwese Eva hemylala riitxenanyre wese wahe. <sup>4</sup> Inyõ kanakeki ròhãletedỹỹmy Jesuisi witxiramy. Tahe kaiboho bityhynybenykekile jiarỹ heka raberumahãre. <sup>5</sup> Ijõ dori ritỹnynymyhỹre iwese inyboho ritỹnynymyhỹrenyre wese aõkõ iwitxiramy. <sup>6</sup> Kaiboho heka tahõtinyamahãtenynte tỹnydyỹdu wihikỹmy inykireny ratximyhỹre. Tahe awiremy idi tahõtinyamahãtenynte. Tai iwesele inyboho roire awi heka roire. <sup>7</sup> Tahe iwese tii awityhymy rarybemyhỹre wesemy aõkõ inyboho rarybemyhỹrenyre. Tahe iny rierymyhỹrenyre inyraykyreny-ki. Sõwemy heka tuu adeereny rarybemahãrenyre. Iu jiarỹ rybe ritỹnynymy akireny rarewãhãu, kiau heka adeereny rexitòenyõhyyre iòwydyỹmy. Iyjamy heka ixidee reijenynyrenyre kaiboho bexiòlònybenykemy. Teòsare òsana iwese rewinyre wese. <sup>8</sup> Ijõ dohodỹỹna mahãduõ heka riwaòwynyre adeereny aritỹnynyrenykemy. Iwese iribi rawasinyre wesemy heka rahõtinyre. <sup>9</sup> Iu akireny rybe-di tỹnydyỹmy rarewãhãu tiu rexitòenyõhyyre adeereny biwawiòhenanykemy. Macedonia

hãwã-ribi dori ityhydÿÿdu, mahãdu seriòreõ aõmybo raruwãhãre wadee diwyde. Tiu heka aõ aribireny aritaõtyhy. Tuu rarehyy wese heka wiji rarekre. <sup>10</sup> Kristu inatyhynamy wadee rarybereri kia wese tule ararybekre ibutumy Akaia hãwã hãwã-ki. <sup>11</sup> Jiarÿ heka aluunihikÿreny. Taile heka tuu rarybewãhãre Deuxule rierye. <sup>12</sup> Kia rybe tÿnydÿÿdu heka iwese rewinywãhãreny wesele ròwidÿÿmyhÿre. Kia heka rewinywãhãreny heka kia rarybereri heka aõ wiribi lahitxi aõkõmy rarybereri. <sup>13</sup> Kahãbu heka inatyhy Deuxu deòdÿÿna aõkõ ratximyhÿre. Ruile heka iaõmysÿdÿÿna-ki ròhònymyhÿre. Rexitÿnynykemy Kristu deòdÿÿna mahãdu-ò. <sup>14</sup> Tahe aõkõre heka Satanasi tule rexiwixiranymyhÿre. ÿju wesemy tii rexideòsinymyhÿre. Kia hãbu teòdu rare. Tai heka irehemy iribi rexiijaranyre òbiti deòdu mahãdu ratxireriki wahe. <sup>15</sup> Urile tuu iny idi ròhòtinykelemy heka tuu ratxirerimy ihÿre. Tahe aõkõre. Ikonanau tahe aõhõkÿmy dÿÿnana ritarenkyre aõbo riwinymyhÿre òraru-ki.

<sup>16</sup> Ixityre tuu ararybekre. Inyõ raykykõmy jiarÿ itxÿte raremy. Ararybekre heka waaõmydÿÿnanarenymy. <sup>17</sup> Teramy ijirarenÿomyke aõmybo ararybekre. Deuxu dori tuu arybedÿÿ-ò riwajjõnymy, tai heka rarybere itxÿte wesele watximahãremy. <sup>18</sup> Kaiboho heka taholahãtenyete itxÿte mahãdu-ò. Katahe bodoholabedenkyre aõmybo ararybekre. <sup>19</sup> Inyõ kedehemynekeki kaa biwinybenkyre. Tahe tewinmahãtenyete aõna aõnamy aõkõ wahe. <sup>20</sup> Inyõ



araitxenanyrenykeki uritere aõmydÿÿrenyõmy tamy. Jiarÿ heka ariwinyõtyhy tuu, wadee awiõre. <sup>21</sup> Ijõ rarybemyhÿre inyõ. Tule jiarÿ ararybekre. Itxÿte wesemy ratximyhÿremy. <sup>22</sup> Tii heka Hebreu mahådumy tii rexininire. Jiarÿ tule kia tuu rare. Ijaò mahådumy heka tiiboho rexininirenyre. Jiarÿ tule. Abraõ riokoremy rarybemyhÿre. Jiarÿ tuleri. <sup>23</sup> Kristu deòdumy heka tii rexininimyhÿre. Rarybemahãre itxÿte wesemy. Jiarÿ heka iratyre deòduwimy watxiwãhãre. Jiarÿ raaõmysÿdÿÿ nihikÿre. Ròtenawo-ò riwarutyrenyre iratyre. Riwahatenyrenyre iratyre. Arurure inihe iratyre. <sup>24</sup> Judeu mahãdu heka 39 hetenamy wamy raòhòtere iruyre sòwemy wahe. <sup>25</sup> Roma mahãdu tasÿ inataõmy riwahatenyre. Sohoji ta mana-di watyure rihure. Ijõtxu heka hãwoninihikÿ heka riorore. Aõutxu heka bera-ki rãire ruu ibutumy txuu tule ibutumy rehure. <sup>26</sup> Ibutumy reamy rarewãhã aõma wasidu bede aõmydÿÿnanamy bera-ki tule arurure inihe. Judeu mahãdu warubudÿÿmy wadi riwisÿnyre. Tule judeukõdu mahãdu tulere. Hãwãhãkÿ-ki brebunatyhymy watxiwãhã, bede rahy-ki tule, ahohokÿ-ki tule. Waliinaõ inatyhy aõkõ tai ihÿmyhÿ. Tai heka riwaitxenanyrenyre. <sup>27</sup> Aõmysÿdÿÿ nihikÿ tai. Tÿikõhyky heka bede reijemy rarewãhã. Rama riwasare; bemy rarowãhãre. Timy heka tÿinatykyõ ihoõhykyre sòwemy wahe. <sup>28</sup> Tai tahe rahòtinyre ibutu dohodÿÿna mahãdu-di. <sup>29</sup> Urihimyòle taruru-di ratxireri wana jiarÿ tule iheki waruruhohomy aõkõ relemahãre. <sup>30</sup> Inyõ raòrarunymyhÿre wana jiarÿ rabadewowãhãre

iòraru-ki. Jiarỹ rexideòsinywãhãre waaõkõre urityhywãhãre. <sup>31</sup> Deuxu Jesuisi Kristu tyby dori riwaerymyhỹre aõu aõu heka iny rakanihikỹnykre. <sup>32</sup> Iu Damasu hãwã-ki rarewãhãu, Iòlò Areta bede dinodu heka riwamymy riwateònyre. riwamykemy hãwãhakỹry ijò-ò. <sup>33</sup> Weriri nihikỹwomy riwawòmý riwatidire, Walina mahãdu. Tahe heto raro-ribi riwaatyre hãwã ahana-ò. Tai tahe rahenyre iribi.

## 12

<sup>1</sup> Jiarỹ heka ararybekemy watzireri. Aõ aõkõ rarehãrele heka ararybekemy watzireri. Wiòhedỹỹna aõkõ heka rare. Wanyrỹ wadee riwahinyre aõna aõnamy heka rabire rasina wese jiarỹ sohojile wahe. Kiamy heka arelyykre wiji. <sup>2-3</sup> Tahe 14 beòramy heka Deuxu ityhydỹỹduõ ridyre biu-ò tasỹ-ò wahe. Deuxule rierymyhyre inatyhy aõbo rare ada aõkõre aõbo. <sup>4</sup> Kahãbu Deuxu-ribi heka rybeõkemy roholare. Tahe rarybeõtyhy. <sup>5</sup> Iximy tahe ararybeõkre kia wadeysarehãre. Waaõhõkỹmy dỹỹnanadile areysakre. <sup>6</sup> Urile ararybekre timybo releremy. Taile tahe iny tuu rarybekre. Tuheka rabire sõwemy aõwihikỹmy. Jiarỹ awiremy iny wamy raraykynyheny. <sup>7</sup> Tahe Satanasi aõbinana witzirahakỹbo wadee riwahinyre. Ixidi arõhõtinyõkre. Jiarỹ aõwihikỹ jiarỹ raremy wahe. Araraykynyõkemy. <sup>8</sup> Inataõmy heka Inynyrỹ-ò rexitòenyre kiamy waribi ritakemy. <sup>9</sup> Tii wadee rarybere: –Waruxetòenale heka adee awire. Aõbo kai taaõkõteu heka waruru adee rewahinyre. –Tai tahe jiarỹ reysare, waaõkõreu

wahe. <sup>10</sup> Tahe awire, waõkõna, warurukõna, ibutumy wadee awire. Kristu òraru-ki heka tuure. Tiubo ibinamy wamy riwinykreu warurukõkreu, warurudikre.

<sup>11</sup> Rarybere heka hãbu itxÿte wesele heka rarybereri. Kaiboho iòrarureny-ki heka kia wesemy rarybereri. Inatyhymy heka jiarÿ kia rybe tÿnydÿÿdu mahãdu bina ratyre watxiwãhãre. Ayreny-ki rarewãhãu heka teerytenynte. <sup>12</sup> Aõna aõna wiwihikÿ, deytana wihikÿ, bedeòtiidÿÿna ayreny-ki rewinyre kia Kristu deòdumy watximyhÿreki wahe. <sup>13</sup> Rybe tÿnydÿÿ òwyõ heka aribireny retaõhyre.

<sup>14</sup> Ihewoludu txu tahe aroramy arakemy ixidi watxireri. Inataõmy reywinyra aroramy arakremy wahe. Aribi nieruõ aritaõtyhy. Urile arawiòhenanyrenykremy adireny watxireri. Uladu riki heka tyby riyrubunyõtyhy. Tyby tahe uladu riyrubunymyhÿre. <sup>15</sup> Ibutumy idi watxireri heka arahukre arawiòhenanyrenykremy. Adeereny wylemy arihukre. Jiarÿ heka aluurenyre. Kaiboho aõbo tule waluurenykre? <sup>16</sup> Waòraru-ki heka adee isiraõkre heka. Ihãrele tahe inybina wamy rarybemyhÿre: –Tii itxenadÿÿdu rare. <sup>17</sup> Wamahãdu tule aribireny ritaõtyhy ijõ. <sup>18</sup> Txitu reteònyrajõ ityhydÿÿdu seriòreõ-wana. Tii aõbo aõ aribireny ritare? Aõkõre. Txitu wawesele heka tii rare.

<sup>19</sup> Taõmysÿdÿÿna heka awiòhedÿÿnarenymy rare. Aõ wadi jiarÿ awiremy nohõtirenyõmy tuheka rarybereri adeereny. Deuxu, Kristudeewinamy heka tuu adeereny rarybereri heka. Deuxu kotxi heka adeereny rarybereri awiòhedÿÿrenymy.

20 Raberumahāre heka arehemynykreu, iwitxiramy atxibenybeke lau. Tule wadi iwitxiramy betehebentyke ixiweserenymy aōkō. Ihāru, adebure. Aōkemy watxireri. Iny aōbina binamy wimy rarybemyhỹre. Iny ixidile rōhōtinyrerimy ihỹre mahādu. Kia aroholakeki tahe wadee awiōre. Riyrubunymyhỹre. Riyrubunyōhyymyhỹre. 21 Raberuwāhāre heka arahinykre heka akotxireny iōhāru òraru-ki. Aōna aōna witxira witxira òta òtamy rōhōtinyrymhỹre, raraykynymyhỹre. Sōwemy heka riwinyre ta ixi-txi tōhōti reaōhyymyhỹre kia riwinyretxi.

## 13

1 Tahe ikonana txu roraludu heka jiarỹ rare. Inyō aōbina binamy wimy rarybemyhỹreki waribi ihitxihitximy heka tuu rarybemyhỹre. Iny rimymyhỹre heka tuu robimyhỹre; tuu rarybemyhỹre. Wiweselemy heka tuu rarybekre. 2 Iny iōrarudimy rỹikre-wana, ibutumy heka aōhōkỹmy rotỹỹnykre arehemynykreu. 3 Aōmy Kristu rybemy heka rarybekre. Tai bierybenykre. Aōmy warurudỹỹdure heka bierybenykre Kristu wahe. 4 Kristu heka itxeò-ki rurure irururenyō wahe. Jiarỹ warurunarenykō òraru-ki. Tahe Deuxu ratximyhỹre, iruruna-di. Tii-wana heka inyboho heka ratximyhỹrenyire iruruōmy. Tai awanarenyle watxireri, tahe tii-wana Deuxu ruruna-wana watxireri. 5 Ixi-di heka betehebentyke. Bexiurihibentyke tyhyna-di atxitenyterimy. Jesuisi Kristu awo-ki ratxireri. 6 Kia terytenytemy, inatyhy. Tahe jiarỹboho inatyhymy aōna aōna riijerenyire. Kia aōbo

teerytenyte. <sup>7</sup> Jiarỹboho rexitòenyrenywãhãrenyre. Òraruna widỹỹrenyõmykemy. Kaiboho aõwiwi biwinybenyke. Kia òbitimy watximyhỹrenyrenki aõkõ, kiemy òbitimy boibenykemy. <sup>8</sup> Aõbo heka inatyhyna wiòhedỹỹnale rikiwinyrenyke. <sup>9</sup> Kaiboho arurudimy atxitenyteri-wana heka, jiarỹboho warurudimy watxiwãhãrenyre, kia wadeereny awi rare. Rexitòenymahãrenyre kaiboho òbitimy matxibenybekemy, ywimy ahãbenykemy. <sup>10</sup> Tai heka adeereny ratyyritinyreri kiamy. Aribireny irehemy watxiwãhãre taheka arawiòhenanyrenyke. Arehemynykreu tahe timy heka aõhõkỹmydỹỹnanamy arõhõtinyõtyhy, kia waaõmysỹdỹỹna rare. Inynyrỹ dori iny wiòhedỹỹnarenymy nade. Iny aõhõkỹmy dỹỹnanamy aõkõ.

<sup>11</sup> Arakre tahe waseriòreboho. Idi biwisỹnybenyke ibutumy òbitimy biwinybenykemy. Warybe-ò heka boholabenyke. Wiwese weselemy maraykywydynanybenyke wiribihiximy aõkõ. Ywina-di matximahãbenyke. Deuxuluuna heka tule akireny ratxikre. <sup>12</sup> Wii birybenymyhỹbenyke ityhydỹỹdu seriòre mahãduõ tai wiluumy atximahãbenyke. <sup>13</sup> Ibutumy Deuxu ijoi mahãdu heka adee rybe riwehityhynanyreri. <sup>14</sup> Jesuisi Kristu Inynyrỹ ruxetòena heka akirenykemy watxireri. Deuxu luuna aki rỹikre. Deuxu Tyytybytyhy awana rỹikre.

## **Deuxu Rybe Tyyriti** **New Testament in Karajá (BR:kpj:Karajá)**

copyright © 2011 Wycliffe Bible Translators, Inc.

Language: Karajá

Translation by: Wycliffe Bible Translators, Inc.

Karajá [kpj], Brazil

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Karajá

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

---

PDF generated using Haiola and XeLaTeX on 21 Feb 2024 from source files  
dated 29 Jan 2022

55ce0bcd-101e-52a3-984e-847027efe150